



## leiteretroum

**Text: Hans Jürg Zingg / Melodie: Hans Jürg Zingg**  
**Begleitimprovisation: Edwin Peter**

un är chlätteret im troum e längi leitere zdüruf  
zringsetum isch s totestiu nume ds schaffe vo sym schnuuf  
unger ihm dr abgrund über ihm es näbulöses glück  
un im inneren e schtimm won ihm bschtändig seit *itz rück!*

*wär nid rückt wär nid rückt wär nid rückt dä isch verrückt*  
*wär nid rückt dä verseit*  
*dä isch chrank dä tuet eim leid*  
*wär nid rückt wär nid rückt wird brutau uf d syte trückt*  
*u drum rückt schtück um schtück*  
*denn im rücke ligt dys glück*

u di leiteren isch solid ja di het was si verspricht  
dürebyssse düreschrysse ein schlappmachen gibt es nicht  
das vrtroue wo men ihm tag für tag entgägebracht  
isch di macht wo ihn moralisch zum wyterrücke zwingt

är het glehrt sech dürezsetze pickuhert und rücksichtslos  
schliesslech tuet är nur sy pflicht u syni pflicht tue giut aus gross  
är het glehrt uf viu zverzichten und verzichtet ou uf viu  
denn är het im oug das einte und unverrückte ziu

*wär nid rückt wär nid rückt wär nid rückt dä isch verrückt*  
*wär nid rückt dä verseit*  
*dä isch chrank dä tuet eim leid*  
*wär nid rückt wär nid rückt wird brutau uf d syte trückt*  
*u drum rückt är schtück um schtück*  
*denn im rücke ligt sys glück*

u di leiteren isch läng u das chlätteren isch schträng  
schritt um schritt mit schturem blick u mit zämebbissne zäng  
was drnäben i dr wäut i de mönsche vor sech geit  
het är mangus zyt u chraft sech scho lang nümm überleit

*gseht er ds läbe das isch hert u nur wär hert isch chas beschtah*  
so tuet är syre frou u syne chinder vortreg ha  
nume dä won är ihm wäg dr herti d ching z verdanke het  
blybt itz weich sy frou di het scho lang en andere im bett

